

CACA CHE DIRUN SAN PABLO, DECHUH YE YAHN IHAN YAHN DENDIOHS CHE VATE YE YAN FILIPOS

1 ¹Nducoyaca nchuhn che ritahno ne Dihvo vo Jesucristo, nedin yahn Dendiohs nchuhn, nduco ihyan ndinan yahn yaco man, ihyan che redin ye ntiyon ndiyaco man, che vate ne yan Filipos ne, u Pablo nduco Timoteo, che redin nuhn ntiyon yahn Dihvo vo Jesucristo, dirun nuhn caca cuh, dechuh nuhn yahn ne. ²Chida vo Dendiohs man, Dihvo vo Jesucristo man, din yahino ye nchuhn, din ye che ndahca cuahenenan ne.

Revah Pablo cava ihyan che ritahno ye Dihvo vo Jesucristo

³Queri ama yune che renechaco nchuhn ne, renechah nundihve cuahn Dendiohs. ⁴Cuahn che revah ne, numacuahn vedeyeno ricá Dendiohs cava ne, ⁵te, nde ro menan nde meniyan, ama rinan ne u che quechicá rahndudó ndudo ndah yahn Dihvo vo Jesucristo. ⁶A devano cuaco te Dendiohs, ihyan min che din ye che ndo ne ihyan ra ne, quendi ye conan ye nchuhn nde nda ro che ndaconan chi tun Dihvo vo Jesucristo. ⁷Redin yahn che ntiyon yan nducoyaca nchuhn cuahn che revah, te ama yahino nchuhn yahn che rinduco ne u nan nducuahn che numacuahn vedeyahino rete yune Dendiohs che rahno ri. Rinduco ne u cuahn che renun vacoyahn man, cuahn che rahndudó ndudo ndah yahn Dihvo vo Jesucristo man, cuahn che rahn nan intiyahn, rahn nan ndudo min man. ⁸A man Dendiohs devano ye che nduhca che ama yahino

Dihvo vo Jesucristo nducoyāco vo ne, tihcā āma yahinó nducoyāca nchuhn. ⁹Ricá Dendiohs che din ye che numacuahn vededevano mān, numacuahn vederendedecadino che ndāhcā mān, tahque quendi ne cuahtenan cuma ne vedeyahino, ¹⁰cāva che tumacadino ne quendi ne dehtenduh che tahque ndah, ne dave yavenān ne, hua chendihco ne nunde cuahn che ndaconan chi Dihvo vo Jesucristo. ¹¹Nduco tihcā ne, conan Dihvo vo Jesucristo nchuhn che runecāde cuahtenan ne cuahn dāma, ne cāva nchuhn ne, ndeva ihyan chenāhn yavenān Dendiohs.

Rahn Pablo te vedeyeno yahn ye che quenān ye iyehnse ne, che ritahno ye Dihvo vo Jesucristo

¹²Dihnó, cuedevano ne te nducuahn che rahno rí ne, ndotenan che to nan nān ntiyon yahn Dihvo vo Jesucristo ne, redin che tahque retuhn ndudo ndah yahn ye. ¹³Nducoyāca sandādo che redin se cudādo palācio yahn emperador, nde nducoyāca ihyan chenāhn ne, a devano ye che quenún vacoyāhn, yahn che redín ntiyon yahn Dihvo vo Jesucristo. ¹⁴Namin a yahn che quenún vacoyāhn ne, a nahn nducoyāca dihno vo ne, ndotenan che dihya nun ino ye co ne, nde tahque richahtino ye Dihvo vo Jesucristo, rahndudo ye numa ino ye Ndudo yahn Dendiohs.

¹⁵A devano nchuhn te nāhn dihno vo ne, rahndudo ye ndudo ndah yahn Dihvo vo Jesucristo, te nahn ye che cotuhn. Me nāhn se ne, ve se mān, cānda tin se mān, ¹⁶ne rahndudo se te nahn se che conahn vederendedecadino yahn mān se. Sāhn chahn ne, o nān o chende se, ne rendedecuan se cānda, te nahn se che tahque chuhríhn, ndedecadinó mān che quenún vacoyāhn. ¹⁷Ate dihno vo chenāhn ne, rahndudo ye, te yahino ye u, ne retumacadino ye che cahnecon Dendiohs che quenún vacoyāhn cāva che cāhma nán ndudo ndah yahn Dihvo vo Jesucristo. ¹⁸Sāhn chahn ne, andahre o nān o chende se, ate hua dehve din yahn, te nducote rahndudo se ndudo ndah yahn Dihvo vo Jesucristo ne, ri yenó.

Nde tahque co yeno cá, ¹⁹te nducote revāh nchuhn cāvā mān, rinan Vaco Dihvo vo Jesucristo u mān ne, a devanó te ndedevahn Dendiohs u vān nducuahn che rechuhríhn. ²⁰Tihcā, te quenān inó che hua co cuihnān, ne cuahn dāma

quendí cuahndudó ndudo yahn Dihvo vo Jesucristo numa inó. A conan cá iyehñse, o çahnó ihyan u, ate nahn quendí çahco ró che ãma yudo vederihquentiyon yahn ye. ²¹Che ãdo yáhn, numanahn che quenán iyehñse ne, che ritahnó Dihvo vo Jesucristo, chemin che vedeyeno yáhn. Me ndete che çahnó ihyan u ne, tahque ndah ro yáhn. ²²Ndete che conan cá iyehñse ne, co quendí cochihvé ñan ntiyon yahn Dihvo vo Jesucristo. Nde hua devanó cha che tahque ndah che çacá Dendiohs. ²³Nde hua rentaquinó cha che tahque ndah. Che ãdo yáhn ne, tahque ndah che cóh, te tuhme ndeva Dihvo vo Jesucristo u. ²⁴Ate che ãdo yahn nchuhn ne, tahque nahn che conan cá iyehñse, te tuhme co quendí conán nchuhn. ²⁵Nducote a devanó te chemin che tahque nahn ne, vá vedeyeno che quendí conán çava che conán nchuhn, ne numacuahn vedeyeno quendi ne cotahno ne Dihvo vo Jesucristo. ²⁶Ndaconán chí quendihcheró nchuhn, ne ãma ndeva ne yavenan Dihvo vo Jesucristo che ndedevahn ye u. ²⁷Codin nchuhn cuande, ne runecãde cuahtenan ne, te nducote ritahno ne ndudo ndah yahn Dihvo vo Jesucristo ne, tihçã redin yahn che din ne. Nduco tihçã ne, a chí quendihcheró nchuhn, o hua, ate náhn che, adecotino che quenán ne, cadinó che ãma cuãñ ndi no ne, ãma ndudo ri no ne, riquendi ne numa ino ne rahndudo ne ndudo ndah yahn Dihvo vo Jesucristo. ²⁸Hua din vah ne sahn che rendihche tañ se nchuhn ñan ntiyon min, te nduco chemin ne, rihnde ro te sahn chahn ne, conda se, ne nchuhn ne, ndedevahn Dendiohs nchuhn. ²⁹Tihçã, te ãma ndah ro yahn nchuhn, rete yune Dendiohs che ndiyu demañ che ritahno ne Dihvo vo Jesucristo, ate namin che rechuhrihn ne çava ye. ³⁰Uvo ne, ãma ri vo nduco vih, numa ino vo redin vo ntiyon yahn Dihvo vo Jesucristo. Nchuhn ne, a ndihche ne nduhçã che chuhríhn ñan ntiyon yahn ye ro menañ. Mañ ne, a devano ne nduhçã che riquendí rechuhríhn.

*Dihvo vo Jesucristo ne, chica ye vahchetero,
ndo ye nduhçã ihyan iyehñse*

2 ¹Ndete che ndichahtino nchuhn Dihvo vo Jesucristo mañ, ndete che numacuahn vedeyahino renecãh yañ ye chedave yahn ne mañ, ndete che quenun Vaco ye nchuhn

man, ndete che chenán cuma ne vedeyahino man, vedevahino man ne, ²tuhme codin nun ino ne, ndahca cuahtenan ama tama ne man, ama no vederendecadino cuahtenan cuma ne nduco vih man, ama no ndudo co ne nduco vih man, codin yahino ama tama ne vih man, cava che nde tahque co yenó cava ne. ³Nan nducuahñ che redin nchuhn ne, hua din yade ne man, hua din ne nde ama nan dehtenduh cava vedeyeno yahn man ne man. Tahque ndah ne ne, cuenevahñecun ama tama ne vih, hua ndahco ndiya ne vih. ⁴Ndotenan che din vi ne ne, cuinan ama tama ne vih.

⁵Cua cuande nchuhn yahn Dihvo vo Jesucristo, cuiquendi ne yune yahn ye. ⁶Ihyan min ne, dama ye nduco Dendiohs. Ate hua quendahnñan ye, chinan ye nduhca che ndinan Dendiohs. ⁷Tahque ndah ne, ndahco ndiya man ye ihyan, ndo ye nduhca ama mozo, chihndeyan ye nduhca che rahteyan ihyan iyehñse. ⁸Numacuahn ro che quenán ye iyehñse ne, ama necun ye man, ama dinahn ye man, nde chihco mendahn ye ihyan, chih ye nan cruz nduhca che rih sahn che chendihco nunde rahte. ⁹Chemin che chihco ndah Dendiohs ihyan lado tah cuaco ye, ne cah ye vederihquentiyon che tahque yudo ihyan, ¹⁰cava che nducoyaca nducondi ihyan, ihyan che chenán ye vahchetero man, ihyan che vate ye numachahte iyehñse man ne, ndeva ye yavenan ye. ¹¹Namin ndeva nducoyaca ihyan yavenan Dendiohs Chida, nevahñecun ye Dihvo vo Jesucristo, ne cahma ye che a ihyan min che Dihve ye.

Ihyan nunde ne, ra cuande ye nduhca che runecqde vatechica ihyan che ritahno ye Dihvo vo Jesucristo

¹²Dihno che yahino nchuhn, nduhca che dinahn nchuhn che chihquentiyón numacuahn ro che quenán yan vaco ne ne, tahque nahn che dinahn ne man che yahn quenán. Numacuahn vedino vedeneñecun quendi ne codinahn ne vederihquentiyon ndah yahn Dendiohs nde nda ro che ndeva ye nchuhn. ¹³A ihyan min che redin ye che devano nchuhn dehtenduh che ndah che nahn ye che din ne, ne rinan ye nchuhn che redinahn ne.

¹⁴Nducuahñ che redin ne ne, codin ne numacuahn vedeyeno, hua quenán ca cahma nunde ne, ¹⁵cava che dave yavenan ne nan nducoyaca ihyan, te daya Dendiohs nchuhn, ne nahn che

runecade cuahtechica ne, cua cuande ihyan nunde. Nduhca iyon che chenān nān ro che diyahn ro nān che āma man ne, tihchan nchuhn vān ihyan nunde, ¹⁶te numa ino ne riquendi ne ritahno ne ndudo ndah yahn Dihvo vo Jesucristo che din che ndevahn ihyan. Nduco tihca ne, co yeno cava nchuhn cuahn che ndaconan chi Dihvo vo Jesucristo, te a devanó che hua chinda ntiyon che dín che cahndudó ndudo yahn ye. ¹⁷Andahre va che cóh nān ntiyon min, ate hua dehve din yahn, te a tihyon yuné nchuhn che chitahno ne Dihvo vo Jesucristo, ne āma co yeno. ¹⁸Namin nchuhn ne, conduco ne u, co yeno ne.

Timoteo nduco Epafrodito

¹⁹Ndete che nahn Dihvo vo Jesucristo ne, nun dechúh Timoteo, quendihchero se nchuhn, te nahn cadinó taça chenān ne cava che co yeno. ²⁰Dechúh sahn min, te metah nde tama se che ndedecadino se nduhca che rendedecadinó, cuahcorān se cava nchuhn, ²¹te nducoyaca sahn chenān ne, rendedecadino se cava che ndah yahn mān se, nde hua rahcorān se cava ntiyon yahn Dihvo vo Jesucristo. ²²Nchuhn ne, a devano ne nduhca che richihve Timoteo, rinan se u nān ntiyon che rahndudó ndudo ndah yahn Dihvo vo Jesucristo. Rinan se u nduhca che rinan ihyan indihte yahn ye. ²³Chemin che va inó che dechúh sahn ndetahno cadinó taça cuhnde cade yáhn. ²⁴Quenan inó Dihvo vo Jesucristo che cuahnecun ye che namin u ne, nun chí quendihcheró nchuhn.

²⁵Rahcó te namin va che dechúh dihno vo Epafrodito che rinduco se u, rinan se u nān ntiyon. Sahn min ne, a mān nchuhn dechuh ne sahn che rinan se u nān vederetahn yáhn. ²⁶Āma nahn nān se, conan se nduco nchuhn. Āma nahn nān se, te devano se che checadino nchuhn che chi cah se, ne hua nahn se che co rān ne cava se. ²⁷Cuāco che āma chi cah se, a ura che coh se. Ate quenān vahino Dendiohs sahn mān, quenān vahino ye u mān, din ye che ndoyahn se cava che hua nde tahque co rān. ²⁸Cava che metah ndedecadino nchuhn cava se ne, chemin che tahque náhn che nān se, ne co yeno ne, ndaconan ndihchero ne sahn. Nduco tihca ne, nuhnde mān inó, co yeno. ²⁹Nducote dama ritahno vo nduco se Dihvo vo Jesucristo ne, cuenevahne ne sahn

numacuahn vedeyeno. Codin yahino ne nducoyaca ihyan che rihco mendahn ye ihyan, redin ye ntiyon yahn Dihvo vo Jesucristo nduhca che redin se. ³⁰Sahn min ne, a ura che coh se nan ntiyon yahn Dihvo vo Jesucristo, chihco mendahn se sahn che rinan se u, redinahn se ntiyon che dechuh ne sahn.

Nahn che runecade cuahtechico vo

3 ¹Dihnó, cuahte ne vedeyeno che ritahno ne Dihvo vo Jesucristo. U ne, hua renduh inó andahre a dirún yahn ne ama nan no, te cochihve yahn ne. ²Cuihco nchuhn cudado, te ama yahn se vatechica se, redetohnan se nan ntiyon yahn Dihvo vo Jesucristo. Sahn chahn ne, a nduhca yahnna tihchan se. Ndere recah rihn se ihyan, rihquentiyon se che conan seña ihyan, ricuahn se che nduco chemin ndevahn ye. ³Cuihco nchuhn cudado, te a uvo che a nedin yahn Dendiohs uvo, ndiyu sahn chahn. A uvo che rendeva vo yavenan ye numa ino vo. Yeno vo che a yahn Dihvo vo Jesucristo uvo, ne hua ndichahtino vo che ndedevahn man vo uvo. ⁴Ndete che cava dehtenduh che redin vo man, tachan ihyan uvo man, che ndevahn vo ne, tuhme u che tahque menan vihca cochahtinó che ndevahn, ndiyu sahn chahn. ⁵Chihno nine ro che chihndeyan ne, chaconahn ihyan seña u. U ne, ihyan naci6n yahn Israel, ndata yahn Benjamín. Ihyan devaco hebreo u nduhca indihthe yahn. Nan vederihquentiyon yahn Dendiohs ne, fariseo u. ⁶Ama din cudado vederihquentiyon min. Ro menan ne, ama din tan nduco ihyan che ritahno ye Dihvo vo Jesucristo. Ama dinahn vederihquentiyon min, nde ama ihyan hua co cahma nunde ye yahn. ⁷Nducuahn dehtenduh chemin chan ne, ama rigonun chihve che lado yahn che rahc6 ro menan, ate chihcoman nducuahn, chitahnó Dihvo vo Jesucristo. ⁸Van nducuahn dehtenduh che co nguahco yahn ne, tahque rigonun chihve che ritahnó Dihvo vo Jesucristo. A chihco vané nducuahn dehtenduh, redin cuandé anduhneca ndete che iyaca, cava che quendí yune yahn Dihvo vo Jesucristo, ⁹ne nedin yahn ye u. Hua richahtinó che ndevahn nduco che dinahn ley che dirun Moisés, te man ne, nduco che ritahnó Dihvo vo Jesucristo ne, nedin yahn Dendiohs u nduhca che redin yahn ye nducoyaca ihyan che ritahno ye. ¹⁰Ama yudo vederihquentiyon yahn Dihvo vo Jesucristo che

ntuche ye van tenahn. Nahn quendí yune yahn ye, conan cumá vederihquentiyon min. Nahn chuhríhn nduhcá che chuhrihn ye, nde cóh nduhcá che chih ye. ¹¹Quenan inó che quendí dináhn yahn ye cava che ndedetuhche ye u van tenahn.

Nahn che quendi vo numa ino vo cotahno vo Dihvo vo Jesucristo

¹²Hua ráhn che a va táh nducuahn, nde huane che ama runecade u, ate riquendí yune yahn Dihvo vo Jesucristo, quenan inó che conahn nducuahn, te a nedin yahn ye u. ¹³Dihnó, nduhcá che a ráhn rí nchuhn ne, metah tuno táh nducuahn. Nde metah retumacáh yahn dehtenduh che a chihcomán cava che quendí numa inó yune yahn Dihvo vo Jesucristo. ¹⁴Nduhcá sahn che rano se cade ne, tihcá riquendí yune yahn Dihvo vo Jesucristo che ritahnó ihyan, nde ndá ro che ndeva Dendiohs u, conán vahchetero.

¹⁵Nducoyaco vo che a ndah renahn vo vederihquentiyon yahn Dihvo vo Jesucristo ne, tihcá nahn che ndedecadino vo. Ndete che hua tihcá rendedecadino nchuhn ne, din Dendiohs che conahn ne nduhcá che nahn. ¹⁶Atanoca nduh, a renahn vo nduhcá che redin yahn, o hua, ate nahn che quendi vo numa ino vo yune yahn Dihvo vo Jesucristo, hua cahcoman vo.

¹⁷Dihnó, cuiquendi nchuhn yune yáhn. Namin cua cuande ne yahn dihno vo che runecade vatechica ye nduhcá che chicuahn nuhn nchuhn. ¹⁸A ama ndeh yune rete cudadó nchuhn yahn sahn che vatechica se rihnceh se. Riquendí riyahvé nchuhn, nde ama ri ndaché, te ama yahn se che rendihche tán se Dihvo vo Jesucristo, redetohnan se vederihquentiyon yahn ye che chih ye nan cruz. ¹⁹Sahn chahn ne, ndere vatechica se vedeyeno yahn man se a chemin che rivahn dendiohs yahn se. Ndotenan che co cuihnan se ne, numacuahn vedeyade vatechica se, rahtendihco se nunde. Ate ndá ro yahn ne, decuihno Dendiohs sahn. ²⁰Me uvo ne, ndi cuande vo vahchetero, ne chenan rino vo che min caca Dihvo vo Jesucristo, ihyan min che ndedevahn ye uvo, ndaconan chi ye. ²¹Uvo ne, ihyan vederih uvo, ate ihyan min ne, rihquentiyon ye nducuahn dehtenduh, ne numacuahn vederihquentiyon yudo yahn ye, ndacorun ye uvo, ndo vo nduhcá man ye.

Cuahte yeno vo che ritahno vo Dihvo vo Jesucristo

4 ¹Dihnó che yahinó nchuhn, ama yeno cava ne, ne ama nahn chí quendihcheró nchuhn. A cava nchuhn che quendah yavenán nan Dendiohs. Nducote chenán rino vo che ndaconan chí Dihvo vo Jesucristo ne, cuiquendi nchuhn numa ino ne cohahtino ne ihyan.

²Evodia nduco Síntique, nducote ritahno te Dihvo vo Jesucristo ne, riyahvé tahn che nchahco te yahn vih, nedin ndah te ndudo nduco vih. ³Me ndih dihnó che ama ndah rinan ne u nan ntiyon yahn Dihvo vo Jesucristo, nahn che conan ne cahvo vo chahn cava che nedin ndah te ndudo nduco vih, te chinan te u, chacotuhn nuhn ndudo ndah yahn Dihvo vo Jesucristo. Namin Clemente man, yahn ca dihnó vo man, chinan ye u nan ntiyon min. Nducoyaca ihyan chahn ne, a ndaconahn caca Dendiohs ihyan cava che cuahtenan ye vahchetero.

⁴Cuahn dama cuahte yeno nchuhn yahn che ritahno ne Dihvo vo Jesucristo. ⁵Codin yahino ne nducoyaca ihyan, cua cuande ye che chenán cuma ne vedeyahino. A devano ne te a nun ndahconan chí tun Dihvo vo Jesucristo.

⁶Hua co ran ne yahn dehtenduh che rahno ne. Cuica ne Dendiohs che conan ye nchuhn nan nducuahn. Namin cuahn che covah ne ne, cuenecah ne nundihve cuahn ihyan. ⁷Ndete che tihca din ne ne, din Dendiohs che ama cuahteman ino ne. Andahre nde ama ihyan hua conan conahn ye yahn, ate din ye che ama cuahteman ino ne. Cuahteman chedave yahn ne man, vederendedecadino yahn ne man, cohahtino ne Dihvo vo Jesucristo.

Ndedecadino vo yahn dehtenduh che ndah

⁸Dihnó, cuendedecadino nchuhn yahn dehtenduh che ndah man, che runecade man, dehtenduh che cuahtenan ino ihyan, ne ndah cahma ye yahn man, dehtenduh che din che ndeva ihyan yavenan Dendiohs man.

⁹Cuiquendi ne nducuahn che chicuahn nchuhn man, nducuahn che ca cuande ne nan renté man, dehtenduh che dín man. Ndete che tihca din ne ne, conduco Dendiohs nchuhn, din ye che cuahteman ino ne nan ye.

Ihyan yan Filipos ne, dechuh ye vedino yahn Pablo

¹⁰Nducote ritahnó Dihvo vo Jesucristo ne, ama ri yenó che rentá tin nchuhn u. A devanó che hua ndinan nchuhn u, ate yahn che yahn chenán ne ne, hua chi che chinán ne u. ¹¹Ndiyu che rahn nundé che ama va vederetahn yahn che tihca rahn, te a ndi ninó che renán vedeyeno nduco adecodehno che rendacá. ¹²A devanó yahn vedechevah, te a nchuhrihn man. Namin a devanó taca cuahn che ama va dehtenduh, te nahn cuan ne, va yahn. Chemin che hua ra cudado u, a va, o metah yahn, andahre nde metah deh che chéh. ¹³Nan nducuahn che rahno rí ne, nde hua ra cudado u, te a Dihvo vo Jesucristo che rínan ye u, rete ye vedechahtino yahn. ¹⁴Andahre hua nduh rendotenán ne, ama ndahca din nchuhn che chinán ne u man che rechuhrihn.

¹⁵Nchuhn ihyan yan Filipos, a devano ne te ro menan cuahn che ndaca nación yahn ne Macedonia, che canan chahn cahndudó ndudo ndah yahn Dihvo vo Jesucristo ne, atenan nchuhn che chinán ne u, dechuh ne vedino yahn, yahn che yeno ne che chinán nchuhn, chitahno ne Dihvo vo Jesucristo. ¹⁶Avane ne, cuahn che metah ndaca nación yahn ne, numanahn che quenán cá yan Tesalónica ne, a nde ro min canan ne, dechuh ne o ino yune vedino yahn, chinán ne u. ¹⁷Ndiyu deman che condá táh vedino yahn nchuhn che tihca dirún yahn ne. Che tahque nahn ne, che din ne che ndah cava che ndahco menun Dendiohs yahn ne. ¹⁸Nduco vedino che dechuh nchuhn nduco dihno vo Epafrodito ne, nde rengava ca yahn. Dendiohs ne, ama renán ino ye che tihca din ne, te anduhneca ndete che cah ne ama vedino ndah ihyan. ¹⁹Ihyan min ne, numacuahn vederihquentiyon chahte yahn ye, conán ye nchuhn nan nducuahn vederetahn yahn ne, te ritahnó ne Dihvo vo Jesucristo. ²⁰¡Ndeva vo yavenan Chido vo Dendiohs cuahn dama! Tihca co.

²¹Numacuahn vedeyahino yahn Dihvo vo Jesucristo, cuenechah nchuhn Dendiohs nducoyaca ihyan yahn Dendiohs che vate ye tan. Cuendeva ne Dendiohs yahn dihno vo che chenán ye muhn nducó. ²²Cuendeva ne Dendiohs yahn nducoyaca ihyan yahn ye che chenán ye muhn, menan vihca ihyan che chenán ye ndevaco emperador.

²³Din yahino Dihvo vo Jesucristo nducoyaca nchuhn. Tihca
CO.